

Txirritola

ARAMAIO / Barikua / 2005eko azaroaren 25a / 173. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Hegazti-gripea dela-eta analisiak egin behar ditu Foru Aldundiak

UBANE MADERA

Hegaztien gripeari aurre hartzeko helburuarekin egin behar dituzte analisiak, prebentzio moduan. Hala, Aramaion, oilo, oilasko edo ahateak dituzten guztiek Udalera joan beharko dute edo hara deitu (945 44 50 16) azaroaren 30a baino lehen.

Udaletxean izena hartuko diete eta txanda eman. Gero, teknikari bat joango zaizkie hegaztiei frogak egitera baserrira, oilategira edo behar den lekura.

OILATEGI GUZTI-GUZTIETAN

Izan ere, Arabako, eta ondorioz, Aramaioko oilategi guztietan egin behar ditu Arabako Foru Aldundiak frogak horiek, nahiz eta oilategiak txikiak izan eta hango hegaztiak etxeko kontsumorako bakarrik izan.

Diputazioaren asmoa da erregistratuta dauden oilategi profesionaletan egitea lehenengo analisiak (Aramaion ez dago halako esplotazio handirik). Eta gero, autokontsumorako diren oilategi txikiak hegaztiei egitea. Hain zuzen ere, laginak har-



Oilategi txiki zein handietan egingo dituzte analisiak; argazkian, Aramaioko oilo batzuk.

tuko dizkiete hegaztiei, haiek analizatzeko. Agertzen diren hegaztien gorpuak, berriz, laborategira eramango dituzte, haiek ere aztertzeko.

Oilategiko hegaztiez gainera, itxian hazitako hegazti basatiak ere kontrolatzeko asmoa du Foru Aldundiak.

Analisi guztiak azaroan hasi eta otsailean bukatuko dituzte, horixe da-eta geurean hegazti-migratzaile gehien ibiltzen den sasoa.

EHIZTARIEK ERE ZAINDU BEHAR

Era berean, ehiztari elkarteek eta hegaztiekin ibiltzen diren bes-

telako elkarteek (albaitariak...) hegazti basatien artean (berezi-ki uretako hegaztien artean) ohikoa ez den edozein heriotza ikusiz gero edo gaixotasun agerraldi esanguratsuren bat ikusiz gero, berehala abisatu beharko dute.

SEGURTASUN NEURRIAK

Horrez gainera, zenbait segurtasun neurri hartzea gomendatu du Foru Aldundiak. Esaterako, ahal den guztietan saihestu egin behar da hegazti basatien (uretakoak, bereziki) eta oilategiko (ahate eta antzarak, batez ere) hegaztien arteko kontaktua.

Hegaztiak dituzten esplotazio guztiek ziurtatu egin beharko dute etxeko ahate eta antzarak oilategiko gainerako hegaztiengandik bananduta daudela.

Eta bestelakoan artean, Diputazioak debekatu egin du Diputazioaren baimen barik hegaztiei txertoa ipintzea. Txerto guztiak Diputazioko Nekazaritza Sailaren zaindartzapean ipini behar dira.

Bestalde, Aldundiak debekatu egin du, baita ere, hegaztiak azoka, erakusketa eta bestelakoetan ipintzea. Debeku hori abenduaren 5era artekoa da, behin-behinera-ko; gero luzatu egin dezake.

LABUR

Iker Agirrek gaur kanporaketa du, Bagare lehiaketan

Bagare bertsolari lehiaketan parte hartzen dute Gasteizen ikasten duten Euskal Herri osoko bertsolariek eta Arabako bertsolariek. Lehiaketa berezia da, kantatzeko moduari edo doinuari garrantzi berezia ematen diolako.

Aramaiokoak arabarrak izanik, herriko bertsolarien ordezkari ere bada Bagare txapelketan. Hain zuzen ere, Andere Arriolabengoak eta Iker Agirrek parte hartu dute; eta oraingoz, Iker Agirrek lortu du lehiaketan aurrera egitea. Hain zuzen ere, gaur, barikua, Bitorianon (Murgia ondoan) hirugarren kanporaketa jokatu beharko du beste bost bertsolariren kontra. Kanporaketa horretan, bestelakoetan moduan, puntu gehien lortzen dituzten lehenengo bertsolari biek lortuko dute finalerako txartela. Besteak beste, zera egin beharko dute: agurra, zortziko nagusian hiruna bertso, zortziko txikian beste hiru bertso eta bakarkako saioa. Lierni Altuna aramaioarra izango dute gaia jartzen. Gaurko saioa 20:30ean hasiko da, Bitorianoko elkartearen.

Eta finala bera datorren astean jokatu dute, abenduaren 1ean, Gasteizko Roman Bajo ikastetxean, 19:00etan.

Antzerki saioa Zigoitian: La Patro Teatro taldea

Talde horrek *Lección de orgasmo* antzezlan egingo du. Sexuaren gaineko argibideak emango dituzte, irakasle baten eskutik. Helduendako antzezlan da eta espainolez egingo dute. 20:00etan hasiko da.

Bestalde, datorren abenduaren 2rako iragarri dute *La lentejuela excéntrica* lana, Dibergente Kukuruzabar Teatro antzerki taldearekin. Kabaret konpainia baten gaineko istorioa kontatuko dute. 20:00etan hasiko da antzezlan eta espainolez izango da.

Euskara ikasiz gero, Udalak diruz laguntzen dio herritarrari urte osoan

U.M.

Udalbatzarraren azkeneko osoko bilkuran bertan onartu zuten euskara ikasteagatik laguntza ematea. Izan ere, dirulaguntzen araudian onartutako ikasketaren bat eginez gero, urteko edozein momentutan eska daiteke dirulaguntza.

Hiru kasutan eska daiteke euskara ikasteko dirulaguntza. Hori bai, eskatzailea Udalean errolatuta egotea ezinbestekoa da.

Batetik, euskaltegi publiko eta homologatuetan ikasten dutenek matrikularen %80 jaso deza-

kete. Hori lortzeko, asistentziaren %80 egiaztatu behar dute. Beste zentzoren bat edo beste metodoaren bat aukeratuz gero, berriz, euskaltegi publikoen kostua hartuko du Udalak oinarri moduan. Bestalde, barnetegietara edo ikas-

taro trinkoetara joaten direnek kostuaren %80 jaso dezakete.

UDAKO EUSKAL UNIBERTSITATEA

Bestetik, Udako Euskal Unibertsitateko (UEU) ikastaroetan parte hartzeko dirulaguntzak ere ema-

ten ditu Udalak. Kasu horretan, matrikularen eta egoitza-gastuen %80 jaso daitezke. Izena emateko orria, programa eta matrikularen egiaztagiria aurkeztu beharko ditu eskaera egiteko.

LINGUISTIKA ETA BESTE

Eta hirugarrenik, linguistika, soziolinguistika eta glotodidaktika plangintzen gaineko ikastaroak edo mintegiak antolatzen dituzten dirulaguntzak ere ematen ditu Udalak. Kasu horretan ere, %80ko laguntza eskura daiteke. Izena emateko orria, programa eta matrikularen egiaztagiria aurkeztu beharko ditu eskatzaileak.

Euskaltegietan edo UEUn ikastearren edo linguistika ikastaroengatik laguntzen du Udalak

Hiru kasuetan, kostuaren %80 ordainduko dio Udalak laguntza eskatzen duenari

TELEFONO JAKINGARRIAK

OSASUNA / LARRIALDIAK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaizta (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zubiako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

OHARRA: izartxoak duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

BARIKUKO ZINEMA

Tim Burton zuzendariaren *Charlie y la fábrica de chocolate* komedia emango dute, 22:00etan, euro baten truke. 116 minutu ditu film horrek. 2004koa da, eta, bestelakoan artean, Johnny Deep, Freddie Highmore eta David Kelly aktoreek parte hartzen dute.

ZERGAK ORDAINTZEKO EPEA

Ondasun Higiezinaren Gainerako Zergak (landa-lurrekin eta hiri-lurrekin lotutakoak) ordaintzeko borondatezko epea da azaroaren 28tik abenduaren 28ra. Kontu korrontea dutenei abenduaren 9an kobratuko dizkiete. Aipatutako epeak pasatu ostean zergak ordaindu ezean, %20ko gainkarguarekin kobratuko dituzte.

ERRETIRATUENDAKO TXANGOIA

Mendabiara (Nafarroa) bidaiari antolatuta dute. Abenduaren 16an izango da. Besteak beste, 08:30ean aterako dira eta 14:30ean iratxen bazkalduko dute. Joan nahi duenak abenduaren 1a baino lehen sartu beharko ditu 25 euro Vital Kutxan, Alaiak elkartearen kontuan.

Ekimen ugari egiten dabilta eskolan; gaur jai izan dute, irakasle egunagatik

U.M.

Gaur, barikua, ospatu dute irakasleen eguna; atzo, eskolako gurasoeekin batzar orokorra egin zuten; eguaztean, berriz, Gatzaga aldean ibili ziren; eta astelehenetik eguenera kontsumo lantegiak egin dituzte. Irudiotako argazkia bidali digute.

Argazkiko astaputza guraso batek hartu zuen, Albinan, eta eskolakoiei eman zien. Haiak eskolan zabaldu eta barrukoa ikusteko aprobetxatu zuten. Bestelakoan artean, kontatu digute bi kilo eta erdi pisatzen zuela perretxikoak.

KONTSUMO LANTEGIAK

Bestalde, azaroaren 27an San Jose de Calasanz eguna da, irakasleen zaindariarena. Baina egun hori domeka denez, aurreratu eta gaur izan dute jai eskolan.

Atzo, berriz, eskolako gurasoak batzar orokorra izatekotan ziren. Gai zerrendan aurreikusitakoaren arabera, besteak beste, 0 eta 2 urte arteko umeendako haurtzaindegia gaineko informazioa helarazi eta webgunea aurkeztu zieten.



SAN MARTIN ESKOLA

Eskolako bigarren mailako ikasleak, Albinan aurkitutako astaputz erraldoiarekin.

takoaren arabera, besteak beste, 0 eta 2 urte arteko umeendako haurtzaindegia gaineko informazioa helarazi eta webgunea aurkeztu zieten.

Horrez guztiaz gainera, oraingo astean beste bi ekimen izan dituzte ikasleek: batetik, kontsumoekin lotutako gaiak landu dituzte kontsumo lantegietan. Esa-

terako, ikasleei erakutsi diete jantzi-etiketako ikurrak irakurtzen eta gauzak birziklatzen.

Bestetik, eskualdea ezagutzeko ekimenean, Gatzaga izan dira.

Gantzagarrak pozik daude aurtengo jaien arrakastarekin

U.M.

Gantzagako jaiak etorri bezain laster joan dira, baina gantzagarrek bi argazkiok bidali dizkigute, gainerako herritarrekin partekatzeko. Oro har, jaien gaineko oso balorazio positiboa egin digute; batez ere, zirku lantegiei eta karta jokoei dagokienez.

Horrez gainera, aurtun, txirrindulari lasterketa berezia izan dute, Gantzagako 25. Txirrindulari Igoera egin dute-eta. Lasterketa horretan, lau txirrindulari saritu zituzten: irabazlea: Francisco Gutierrez zaldibartarra; auzoko lehenengoa: Aitor Errasti eta lehenengo gaztea: Aitor Azkarraga-Urizar. Horrez gainera, proba berezia antolatu zuten 25. urteurrenaren

rengatik: Urdungio baserrira igotzea. Proba horretan, bi txirrindulari bakarrik lortu zuten Urdungio baserrirako aldapa menderatzea. Bien artean lehenengoa izan zen Oier Garro.

EKITALDI ARRAKASTATSUAK

Bestelakoiei begiratuta, berriz, antolatzaileak oso gustura daude Txilipurditik Zirku Tailerrak izan-

dako arrakastarekin: "Zirku lantegia gazteendako nahi genuen, 11-15 urtekoendako-edo, baina azkenean guztiok parte hartu genuen eta oso-oso gustura ibili ginen".

Karta-jokoei ere arrakasta handia izan zutela kontatu digute eta kantu afarian oso ondo ibili zirela. Hala, oro har, auzoko jaien gaineko oso balorazio positiboa egin dute gazteek, jaien antolatzaileek.



GANTZAGAKO GAZTEAK

Gantzagako gazteak auzoko San Millan ermitan, aurtengo jaietan.



GANTZAGAKO GAZTEAK

Unai Larrañaga eta Oier Garro Urdungio baserrirako igotzeran.